



❖ CALANAS. ❖

“*Agus shnìomh na mnathan uile a bha glic-chridheach le'n làmhnan, agus thug iad leo an nì a shnìomh iad, an gorm, agus an corcur, an scàrlaid, agus an t-anart grinn. Agus na mnathan uile a dhùisg an cridhe suas ann an gliocas shnìomh iad fionnadh ghabhar.*”—

*ECSODUS xxxv. 25, 26.*

Oh, air chinnt' cha sglèò no brудар,  
 'Bha 's an t-sealladh ghrinn a fhuair mi,  
 No 's an òran bhinn a chualar  
 'Tigh'nn a nall á Tìr na gréin'!  
 Fad' air chùl nan linn a dh' fhàg sinn,  
 Chì mi 'null air cluain an fhàsaich,

---

**Price- One Half-Penny.**

Té de nigh'na dualach Iàcoib  
 Anns an teach, a snìomh, 's a seinn :

Taobh a teallaich, ris an lòchran,  
 Ghabh i 'chuigeal ghleusd' 's an dòrnaig,  
 Thoinn i 'n lìon ri fonn a chrònain—

Oh, bu gheal a làmhan mìn !  
 Tearuinte, fo dhìon a' Bhaideil,  
 Ann 'n an suain bha càch 'n an cadal,  
 Ach cha dual gu 'm b' obair fhadail  
 A bh' ann dh' ise, 'snìomh an lìn.

Chì mi 'n Camp 'n a luidhe sàmhach,  
 Sìth a rìoghachadh 's gach pàilliuin,  
 Neul na glòir a' cumail sgàile

Mar a b' àbhaist os an ceann ;  
 Eiridh tric an sealladh glòrmhor  
 Air mo chrìdh' le neart a's sòlas,  
 'S tric a thig an duanag cheòlmhor  
 Thairis orm, le fonn nan rann :—

*A N T-O R A N.*

Oh, 's aoibhinn an obair leam 'snìomhadh an lìn,  
 Cha dragh leam, ach sòlas, a toinneadh gu grinn,  
 Oh, 's beannaicht' mo chuigeal, is beannaicht' mo làmh,  
 'S i obair Iehòbhah dhomh 'snìomhadh an t-snàth :

Oh, 's beannaicht' mo chluas-sa a chualaig an fhuaim—  
 Thig Dia, 's ni E còmhnuidh am meadhon A shluaigh—  
 Seadh, dh' earb E ruinn Pàilliun a thogail Dha Féin,  
 A's gheall E a làth'rachd an còmhnaidh 'bhi leinn.

Cha 'n ann air son pàigheadh a bheir mi mo shaoth'ir,  
 Do 'n Tighearna bheir mi gu saobhir 's gu saor,  
 'S e 'Làmh-san a bhuilich na th' agam de stòr,  
 Tha Esan a frasadh a mhana mar lòn ;  
 Ar teach anns an fhàsach tha againn gun mhàl,  
 Tha dachaidh 'n ar sealladh a mhaireas gu bràth,  
 Tìr àluinn a gheallaidh, le bainn' agus fion,  
 S cìr mhilis na meala a sruthadh a sìos.

Cha 'n 'eil mi a tabhairt mo shaothair mar dhuais,  
 Gu maitheanas pheacanna fhaotainn mar luach,  
 Oir leagadh mo chionta air ìobairt-na-réit',  
 A's dh' fhuiling 'am riochd-sa an creutair gun bheud,  
 Gach bagradh, a's tagradh an lagha tha balbh,  
 A nochd tha 'm boc-gaibhre 'g a leigeadh air falbh,  
 A's teichidh an ìobairt, le 'm lochd air a cheann  
 Gu fàsach na dì-chuimhn', air aodann nam beann.

Oh, bheir mi mo shaothair mar chomharradh gràidh,  
 Do 'n Tighearn', a shaor mi o bhi ann am thràill ;  
 A's togaidh mi ceòl Dha 's mi 'snìomhadh an t-snàth,  
 Oir mairidh A thròcair 's A mhaitheas gu bràth.  
 Oh, m' anam, na dì-chuimhnich Cobhair nam buadh,  
 A dh' fhuasgail gu glan thu á Eiphit na truaigh,

Air ùrlar an Doimhne 'rinn slighe fo d' chois,  
'S a threòraich do cheuman tre ghlaice A bhois.

Oh, cuimhnich mar 'philleadh Leis tonnan a' chuain,  
'S na h-uaibhrich ud uile chaidh fodha mar luaidh,  
Na naimhdean a chiosnaich, a lot sinn, 's a chràidh,  
Cha 'n fhacar a rìs iad, ach marbh air an tràigh !  
Air sgiathaibh na h-iolaire thogadh a Chlann,  
Gu searbh-uisge Mhàra, gu Elim nan crann,  
Gu Sinai nan stuadh-bheinn, le 'dheatach, 's le 'neòil,  
Gu éisdeachd le 'n cluasan ri briathran A bheòil.

Mo chùram bha daonnan mu eudach do 'm chlann  
A nis tha mi saor dheth, cha chaithear na th' ann,  
Tha falluinn a 's brògan, tha coirce nan speur,  
A 's uisge gu leòir ann dhuinn uile gu léir ;  
Sinn féin a 's ar cùram, gach dragh agus feum,  
Tha 'n Tì 'tha 'g ar stiùradh a gabhail air Féin,  
Ach an t-saorsa, 's an fhois, cha 'n 'eil annta ach dealbh  
Air a mhaitheas 'tha feitheamh 'an dùthaich ar sealbh.

Oh 's aoibhinn an obair leam toinneadh an lìn,  
Mar mhana cho geal e, mar shìoda cho mìn ;  
Gleidh Thusa, a Thighearn, mo làmhan o smal,  
Nach toir mi air D' obair-sa dochann no sal :  
Tha càch de na mnathan le dathan cho briagh  
Ris an speur 'nuair tha 'ghrian a dol fodha 's an iar,

Ach an uair a bhios snìomhadh gach té againn réidh,  
Theid gach snaithn' eadar-dhealaichte fhigheadh 'na chéil'.

Oh, 's àrd leam an smuain gu'm bi obair mo laimh  
Aig Dia mar a Chòmhdach 'an Ionad a Thaimh !  
Tha ealain nam fear ann am fiodh agus òr,  
Ach 's iad làmhan nam ban a bheir Sgàile d' A Ghlòir.  
Mo shnaithne, ge faoin thu, cha 'n fhaod thu 'bhi balbh,  
Mar fhianuis mo mhiann thu'measg shamhladh a's dhealbh  
Mo shùil tha air Tì 'thig ri linntean an àigh  
Ar Sagairt, ar n-Iobairt, ar Rìgh E, 's ar Fàidh !

Oh nì mi mo dhìchioll a' snìomhadh an t-snàth,  
Oir 's fheudar mo thiodhlac a thabhairt gun dàil  
Mu 'n abair an Tighearna,—“ Fhuair Mi gu leòir,  
Cha 'n 'eil ann ad chuid-sa ach tuilleadh 's a chòir !”  
Tha fàinneachan prìseil, tha seudan thar luach  
A's sgàthan an rìomhach 'g an càrnadh mar chruaich,  
A's bhiodh e am feasda a bioradh mo chrìdh'  
Na 'm bithinns' air deireadh le obair mo Rìgh !

Thoinn i 'm badan lin gu bòidheach,  
Sguir a saothair, stad an crònán,  
Chuir i seach a h-obair còmhladh,  
'S ghabh i fois ri taobh a clann,  
Mar na h-eòin fo sgéith na Màthar,  
Bha an Camp 'na luidhe sàmhach,

Neul na Glòir a cumail sgàile,  
 Mar a b' àbhaist, os an ceann :

Oh, tha leam nach sgleò, na bruadar,  
 'Bha 's an t-sealladh ghrinn a fhuair mi,  
 Na 's an òran bhinn a chualar  
 'Tigh'nn a nall á Tir na gréin' !  
 Eiridh tric an sealladh glòrmhor  
 Air mo chridh' le neart a's sòlas,  
 'S tric a thig an duanag cheòlmhor  
 Thairis orm, a's mi leam fhéin !

*Eadar. le K. W. G.*



*MIANN A' CHRIOSDAIDH.*

Cha 'n iarrainn-sa fuireach air thalamh gu bràth,  
 Na 'n tigeadh an cuireadh 's mi 'dh 'fhalbhadh gun dàil,  
 'S leòir làithean ar turuis ge tearc iad, a's gearr,  
 Làn aoibhneis a's mulaid, làn sòlas a's cràidh.  
 An diùltainn-sa imeachd, mar ghealtair truagh,  
 Leis gach Naomh air an t-slighe do'n Dùthaich ud shuas?  
 An fanainn 's an t-saoghal air aineoil, leam fhéin,  
 'S d' an deachaidh mo dhaoine a ghreasad gu léir?

Cha 'n iarrainn-sa fantainn gu bràth air an t-saogh'l,  
 Le laigse 'gam leantainn 'measg fhaileasan baoth  
 Mar an calman air faontra thar luasgadh nan tonn,  
 Gun suaimhneas ri fhaotainn, gun bhunait fo m' bhonn,  
 Cha luaith 'tha mi saoil sinn gu 'n d 'thàinig an fhéith,  
 'S tha na neòil throma 'sgaoileadh ro' aghaidh na gréin,  
 Agus bogha mo dhòchais a dealradh 'san speur,  
 Na 'chaillear iad còmhlà 'an duibhre gun reul.

Oh 's mise nach fanadh gu bràth air an t-saogh'l,  
 Am peacadh 'gam ghonadh gun tàmh air gach taobh,  
 'N taobh stigh dhiom tha truailleachd 'gam leagail's an ùir,  
 'N taobh mach dhiom tha buaireadh gach latha às ùr :  
 Tha sòlas a mhaitheanais measgte le deòir,  
 Agus copan na slàinte le ball-chrith 'ga h-òl,  
 Tha 'n trompaid a séideadh àrd chaithream a bhuaidh,  
 Ach tha m'anams'ag éigheach an uaigneas, "*mo thruaigh!*"

Cha 'n iarrainn-sa fantainn air thalamh a ghnàth,  
 Ro 'n uaigh cha bhi geillt air mo chridhe, na sgàth,  
 Luidh Iosa mo Shlànuighear innte gun fhiamh,  
 'S cha'n fhuar a bhios leamsa caomh leaba mo Thriath.  
 Thig briseadh na fàire gu m' mhosgladh a suas,  
 Thig armailtean deàrrsach nan aingle a nuas,  
 A 's dùisgidh na slòigh 'tha 'san duslach 'n an suain,  
 Gu éiridh 'thoirt còmhlail le chéile do 'n Uan.

Cò 'roghnaicheadh fantainn 's an t-saoghal r'a bheò?  
 Bho 'n Tighearna daonnan air choigrich 's an fheòil,  
 Air falbh bho ar n-oighreachd 'tha taigste air Nèamh,  
 'S na h-aimhnichean aoibhneis 'tha sruthadh gu sèimh!  
 An sud tha na Naoimh de gach linn agus àit'  
 A cur fàilt' air am bràithre 'an Aros a' ghràidh,  
 Le aingle, do 'n Ard-Rìgh a togail nan dàn,  
 Oir le soillse A laith'reachd tha 'n gairdeachas làn.

Cluinn an ceòl! Cluinn na h-òrain ag éiridh gu binn!  
 Tha saor-dhaoin' an Tighearn le caithream a' seinn!  
 A's, gu sàmbach a fosgladh nan geatachan òir,  
 Faic, an Rìgh tha 'n a mhaise a dealradh le glòir!  
 Nan robh agamsa sgiathan, 's mi 'ghreasadh a suas,  
 Gu tuiteam aig cosan m' Fhir-saoraidh 's mo Luaidh;  
 Tha mi 'feitheamh A theachdaireachd, òrdugh an àigh,  
 Haleluia—Amen—Leis an Tighearn gu bràth!

*Eadar. le K. W. G.*

